

दिनांक 25.10.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी काल आकाशवाणी ऊँ प्रसारित कर्या जावण वाळा खास कार्यक्रम **मन की बात** मांय विचार बतावेला।
- केन्द्रीय स्वास्थ्य अर परिवार कल्याण मंत्री जगत प्रकाश नड्डा कह्यो—देश मांय मेडिकल कॉलेजां री तादाद बध र 819 व्ही।
- उत्तर-पश्चिम रेलवे त्र्यौहारां रा दिनां मांय मुसाफिरां रा सुबीता सारू खास प्रबन्ध कीना।
अर
- सूरज री पूजा रो महापर्व छठ आज नहाय-खाय सागे सरू व्ह्यो।

000

आकाशवाणी ऊँ हर महीना प्रसारित कर्यो जावण वाळो खास कार्यक्रम **मन की बात** काल प्रसारित कर्यो जावेला। प्रधानमंत्री नरेन्द्र मोदी रा ई कार्यक्रम री आ 127 वीं कड़ी व्हेला। ओ कार्यक्रम संवारे 11 बज्यां ऊँ आकाशवाणी अर दूरदर्शन रा पूरा नेटवर्क माथे प्रसारित कर्यो जावेला। ई सागे ई आकाशवाणी समाचार री वेबसाइट, न्यूज ऑन एआईआर मोबाइल एप, आकाशवाणी समाचार, दूरदर्शन समाचार, प्रधानमंत्री रा दफ्तर अर सूचना अर प्रसारण मंत्रालय रा यू-ट्यूब चैनलां माथे ई ओ कार्यक्रम प्रसारित कर्यो जावेला।

000

स्वास्थ्य अर परिवार कल्याण मंत्री जगत प्रकाश नड्डा कह्यो है के देश मांय चिकित्सा शिक्षा हलका मांय घणो चोखो काम व्ह्यो है। वे आज नई दिल्ली मांय अखिल भारतीय आयुर्विज्ञान संस्थान-एम्स रा 50 वां दीक्षांत समारोह मांय बोल रह्या हा। श्री नड्डा कह्यो के देश मांय अब आठ सौ 19 मेडिकल कॉलेज व्हे ग्या है। वे कह्यो के देश रा मेडिकल कॉलेजां मांय स्नातक स्तर री सीटां 51 हजार ऊँ बध र एक लाख 29 हजार जद के स्नातकोत्तर स्तर री सीटां री तादाद बध र करीब 78 हजार व्हे ग्यी है।

000

निर्वाचन आयोग सियासी पार्टियां अर उम्मीदवारां ऊँ चुनाव रे दौरान आर्टिफिशियल इन्टेलिजेन्स ऊँ बणायी ज्यी सामग्री ने ज़िम्मेदारी ऊँ काम लेवण बाबत कह्यो है। आयोग गैर-कानूनी अर किण ई री पिछाण, रूप या आवाज ने वां री सहमति बगैर पेश करण ऊँ बचबा री राय दीनी। ई बीचे अंता विधानसभा उपचुनाव रा तैत पोलिंग पार्टियां मांय ड्यूटी वाळा कर्मचारियां रो सामान्य पर्यवेक्षक सुभाश्री नंदा अर जिला निर्वाचन अधिकारी रोहिताश्व सिंह तोमर री मौजूदगी मांय आज कंप्यूटर सॉफ्टवेयर रे जरिये दूजो रेंडमाइजेशन करी ज्यो।

0000

भारतीय पुलिस सेवा रा 1996 बैच रा अहलकार सचिन मित्तल आज जयपुर रा पुलिस आयुक्त ओहदा रो काम-काज संभाळ लीनो। वे बीजू जॉर्ज जोसेफ री ठौड़ लीनी। काम-काज संभाळ्यां पाछे खबरनवीसां सागे बातचीत करता थकां मित्तल कह्यो के वे लोगां री समस्यावां पुलिस थाणां मांय ई दूर करण माथे खास ध्यान देवेला। वे कह्यो के मुश्किल हालात मांय 100 या 112 नंबर माथे शिकायतां माथे तुरत कार्रवाई करण बाबत ई खास ध्यान दियो जावेला। नुवा पुलिस कमिश्नर कानून व्यवस्था बणायी राखण अर अपराधां माथे काबू करण, गाड़ियां री आवण जावण री व्यवस्था बणायी राखण अर असहाय अर पीड़ित लोगां री संवेदनशीलता सागे बेगी सुणवाई तैय करण माथे ई जोर दीनो।

आज ई आला आई.पी.एस. अहलकार राहुल प्रकाश ई पुलिस कमिश्नर जयपुर मांय स्पेशल पुलिस कमिश्नर (ऑपरेशन्स) रा ओहदा रो कामकाज संभाळ लीनो।

000

उत्तर-पश्चिम रेलवे त्र्यौहारां रे मौके मुसाफिरां री मोटी तादाद ने ध्यान राखता थकां न्यारी-न्यारी ठौड़ां सारु 107 खास गाड़ियां रा 987 फेरा करा रह्यो है अर 60 नियमित रेलगाड़ियां मांय पौने दो सौ और डिब्बा जोड़या है। जयपुर, जोधपुर, अजमेर अर रींगस सरीखा खास टेशनां माथे मुसाफिरां रा सुबीता सारु होल्डिंग एरिया बणायी ज्या है जठे बैठण री ठौड़, पीवण रा पाणी अर टिकट रा सुबीता मुहैया करायी ज्या है। टेशनां माथे लेवण-छोडण सारु आवण वाळां री तादाद कम करण सारु प्लेटफॉर्म टिकट ई नी दिया जा रह्या है।

000

सूरज री पूजा रो पर्व छठ आज 'नहाय-खाय' सागे सरु व्ह्यो। राज्य रा भरतपुर अर भीलवाड़ा समेत केई जिलां मांय ओ पर्व उमाव सागे मनायो जा रह्यो है। चार दिन रा छठ पर्व सारु भरतपुर मांय ई धार्मिक उमाव निजर आ रह्यो है। म्हाणा खबरनवीस बतायो के नहाय-खाय री रीत रा तैत लोग पवित्र स्नान कर सात्विक भोजन कीनो।

प्रधानमंत्री नरेन्द्र मोदी अर गृहमंत्री अमित शाह छठ पर्व रे मौके शुभकामनावां दीनी है। वे व्रत राखण वाळा जातरुआं रा भक्तिभाव ने सोशल मीडिया पोस्ट रे जरिये नमन कीनो। गृह मंत्री अमित शाह ई सोशल मीडिया पोस्ट रे जरिये छठ मैया ऊँ सगळां री सुख-समृद्धि री प्रार्थना कीनी है।

000

जैसलमेर मांय 14 अक्टूबर ने एक बस मांय लाय लाग जावण रा हादसा रे कारण मरण वाळां री तादाद 27 व्हे ग्यी है। ई हादसा मांय घणो जख्मी एक और जणो आज दम तोड दीनो। हादसा रे कारण जख्मी एक और जणो हाल ई वेंटिलेटर माथे जिन्दगी री जंग लड़ रह्यो है, जद के तीन और जख्मी लोगां रो ईलाज चाल रह्यो है।

000

वरिष्ठ नागरिक तीर्थ यात्रा योजना रा तैत आज भरतपुर रेलवे टेशन ऊँ रामेश्वरम्-मदुरई सारु खास रेलगाड़ी रवाना व्ही। जिला कलेक्टर कमर चौधरी ई गाड़ी ने हरी झंडी बता र रवाना कीनी। ई गाड़ी मांय भरतपुर टेशन ऊँ भरतपुर, करौली अर डीग जिलां रा 500 बुजुर्ग सवार व्ह्या। कलेक्टर बतायो के सफर रे दौरान मुसाफिरां री देख-रेख सारु ट्रेन प्रभारी, हर डिब्बा मांय दो सरकारी कर्मचारी, एक डॉक्टर अर दो नर्सिंग अधिकारी भेजी ज्या है।

000

उपमुख्यमंत्री दिया कुमारी आज शासन सचिवालय मांय जयपुर व्यापार महासंघ रा नुमाइन्दां सागे मीटिंग कीनी। वे गैर-कानूनी कब्जा, गाड़ियां ऊबी करण सारु ठौड़, ई-रिक्शा चलावण अर चोरी री वारदातां अर साफ-सफाई समेत न्यारी-न्यारी व्यवस्थावां रा बारा मांय विगतवार बातचीत कीनी। उपमुख्यमंत्री अहलकारां ने बाजार मांय खास-खास ठौड़ां सीसीटीवी कैमरा लगावण बाबत् कह्यो। वे नाइट बाजार विकसित करण अर सड़कां माथे डिवाइडर मांय रूखड़ा रोप र ग्रीन ज़ोन बणावण रा हुकम ई दीना।

000

'गिव-अप अभियान' रा तैत प्रदेश मांय 41 लाख जणा मर्जी ऊँ खाद्य सुरक्षा योजना रो फायदो छोड़यो है जद के 69 लाख ऊँ बत्ता नुवा पात्र पिरवारां ने ई योजना ऊँ जोड़ी ज्या है। खाद्य, नागरिक आपूर्ति अर उपभोक्ता मामलात मंत्री सुमित गोदारा जैसलमेर मांय आ जाणकारी दीनी। वे बतायो के जैसलमेर जिला मांय 43 हजार 164 जणा मर्जी ऊँ इण रो फायदो छोड़यो जद के 70 हजार 821 नुवा पात्र पिरवारां ने ई योजना ऊँ जोड़ी ज्या है।

000

केंद्र सरकार कानी ऊँ चलायी ज्या जीएसटी बचत महोत्सव री भीलवाड़ा मांय दवाइयां रा करोबारी सराहवणा कीनी है। मेडिकल व्यवसायी अनिल जैन कह्यो के भांत-भांत री दवाइयां माथे जीएसटी मांय छूट ऊँ जनता ने साता मिली है।

000

चित्तौड़गढ़ ज़िला मांय रावतभाटा रा भारी पानी संयंत्र मांय आज संवारे हाइड्रोजन सल्फाइड गैस रा रिसाव रे कारण पाँच कर्मचारी मांदा व्हे गया। घणा मांदा दो जणां ने ईलाज सारू कोटा रेफर करी ज्या है। संयंत्र रा महाप्रबंधक पी. सतीश बतायो के रख-रखाव रा काम रे दौरान एक गैस किट मांय रिसाव व्ह्यो हो, ज्यी माथे तुरत काबू कर लियो ज्यो। गैस रिसाव रा कारणां री जांच सारू कर दीरीजी है।

000

उदयपुर अर कोटा संभाग मांय आज कठे-कठे हल्की बिरखा रा आसार जद के 27 अर 28 अक्टूबर ने राज्य रा लंकाऊ अर लंकाऊ-ऊगणी हलका मांय मझला ऊँ भारी दर्जा री बिरखा व्हे सके है। मौसम विज्ञान केंद्र जयपुर रे मुजब आज ऊँ 29 अक्टूबर बीचे प्रदेश रा ऊगणी अर लंकाऊ हलका मांय बादळां री गाज सागे बीजळी चमकण अर तेज बारिश री शंका है। किसानों ने खुल्या मांय राख्योड़ी साखां अर अनाज ने ढक र राखण री राय दीरीजी है।

000

श्रीगंगानगर अर झालावाड़ ज़िला रा अकलेरा री मंडियां मांय किसानां रा भला अर कृषि जिन्सां ने बेचण सारू मार्केटिंग रा सुबीता बधावण बाबत् मुख्यमंत्री भजन लाल शर्मा 2 करोड़ 28 लाख रुपया मंजूर कीना है। ई रकम मांय ऊँ अकलेरा री कृषि उपज मंडी मांय ई-नाम हॉल समेत बणायी-चुणायी रा नुवा कामां सारू 1 करोड़ 78 लाख रुपया मंजूर करी ज्या है। श्रीगंगानगर री मंडी रा फल-सब्जी यार्ड मांय बुनियादी ढांचा ने मजबूत बणावण सारू करीब 50 लाख रुपया रा खर्च ऊँ बिजली ऊँ जुड़्या काम कराया जावेला। ई सागे ई टोंक ज़िला मांय टोडारायसिंह री कृषि उपज मंडी सारू प्रथम बोर्ड बणावण री मंजूरी ई दीरीजी।

000

श्रीगंगानगर रा स्थापना दिवस सिलसिला मांय तीन दिन रो 'गंग महोत्सव' आज सारू व्ह्यो। विधायक जयदीप बिहाणी अर जिला कलेक्टर डॉ. मंजू महाराजा गंगा सिंह स्टेडियम मांय हॉकी, वॉलीबॉल अर खो-खो री होड़ां सागे ई रो उद्घाटन कीनो। ई मौके खिलाड़ियां ने नशामुक्ति री शपथ दिरायी ज्यी।